

इवनिंग डोगरी न्यूज़ बुलेटिन

समे 18:15 Hrs

<><><><><><>

Headlines

- केन्द्र सरकार ने जम्मू-कश्मीर च कुदरती क्रोपियें करी तबाह होए दे 5 हजार शा मते घरें-मकानें दे परतियै निर्माण लेई मंजूरी देई दिती ऐ। लैफ्टिनेंट गवर्नर मनोज सिन्हा होरें एदे लेई प्रधानमंत्री नरेन्द्र मोदी ते केन्द्रीय ग्रामीण विकास मंत्री हुंदा आभार जताया ऐ।
- केन्द्रीय मंत्री डाक्टर जितेन्द्र सिंह होरें डोडा बजार दा दौरा लाइयै मकामी बपारियें ते लोकें थमां GSTएं दरें च कटौती दे फायदें बारे प्रतिक्रिया लैती।
- खेड मंत्री सतीश शर्मा होरें आखेया ऐ जे बेरोजगारी जम्मू-कश्मीर च चैंता दा इक बड्डा विशे ऐ ते सरकार एदे बनकदे हल तुप्पने आस्तै वचने-बज्झी दी ऐ।
- सैलसफा सरबन्धी कुल संसारी ध्याड़े दे मौके पर अज्ज जम्मू-कश्मीर विरासती सैर ते सांस्कृतिक कार्यक्रमें दा आयोजन- एल.जी मनोज सिन्हा होरें सब्भनै गी जम्मू-कश्मीर औने ते इत्थू दी सगगोसार सांस्कृतिक विरासत दा अनुभव करने दा साद्दा दिता ऐ।
- जम्मू-कश्मीर दियें शीतल देवी होरें इतिहास रचदे होई छड़ी 18एं बरें दी उम्री च पैरा विश्व तीर-अंदाजी चैम्पियन बनने दी उपलब्धी हासल करी लैती ऐ।

<><><><><><>

LG PMAY-G

लैफ्टिनेंट गवर्नर मनोज सिन्हा होरें जम्मू-कश्मीर दे ग्रामीण इलाकें च हाल च आई दियें कुदरती क्रोपियें कारण तबाह होए दे 5 ज्हार 61 घरें-मकानें दे निर्माण गी मंजूरी देने लेई प्रधानमंत्री नरेन्द्र मोदी ते केन्द्रीय ग्रामीण विकास, राई-बाई ते करसान कल्याम मंत्री शिवराज सिंह चौहान हुंदा धन्नवाद कीता ऐ। सोशल मीडिया मंच एक्स पर इक पोस्ट च एल.जी. होरें दस्सेया जे प्रधानमंत्री आवास योजना-ग्रामीण दी विशेष परियोजना दे तैहत इस मंजूरी कन्नै ज्हारां बद्दे घरें च सुरक्षा ते स्थिरता ब्हाल होग ते परोआरें गी आर्थिक सुरक्षा परतियै हासल करने च बी मदद थोग।

<><><><><><>

प्रधानमंत्री हुंदे दफ्तरै च राज्य मंत्री डाक्टर जितेन्द्र सिंह होरें अज्ज डोडा कस्बे दा दौरा लाया ते उत्थें मुकामी बजारें च जाइयै दुकानदारें, कारोबारियें ते बसनीकें कन्नै गल्लबात कीती ते माल ते सेवा कर (जी.एस.टी) गी घट्ट करने दे सरकार दे हालिया फैसलें बारे उंदी प्रतिक्रिया हासल कीती। दुकानदारें नमीं जी.एस.टी नीति दा सोआगत करदे होई आखेया जे एहदे कन्नै नां छड़ा बपारियें गी सगुआं आम उपभोक्ताएं गी बी राहत थोग। उनें सरकार दी इस पैहलकदमी दी सराहना करदे होई आखेया जे एहदे कन्नै बपार गी बढ़ावा थोग ते लोकें पर माली बोझ बी घट्ट होग। आकाशवाणी समाचार कन्नै गल्ल करदे होई डाक्टर जितेन्द्र सिंह होरें आखेया

<><><><><><>

GST Reforms

नमें जी.एस.टी सुधारें दे तैहत सरकारै केई सारी ऐसी चीजें पर बी टैक्स दी दर गी घट्ट कीता ऐ जेहदे कन्नै सैलसफा ते सार्वजनिक ट्रांसपोर्ट आले खेतर मते किफायती बनी गे न। इ'नें सुधारें कन्नै बक्ख-बक्ख खेतरें च रास-पूंजी ते कम्म-रोजगार दे मौके बी पैदा होआ करदे न। साइदे 7 जहार रपे इक रात दे स्हाबै मिलने आहले होटल दे कमरे पर जी.एस.टी दी दर गी 12 फीसद शा घटाइयै 5 फीसद करी दिता गेआ ऐ

<><><><><><>

खेड्ड मंत्री सतीश शर्मा होरें अज्ज आखेया जे जम्मू-कश्मीर च बेरोजगारी इक बड्डी समस्या बनी दी ऐ। बारामूला च पत्रकारें कन्नै गल्लबात करदे होई उनें नौकरी हासल करने आलें गी दरपेश मुश्कलें गी स्वीकारेया ते इस गल्लै पर जोर दिता जे सरकार एहदे हल तुप्पने आस्तै पूरी चाली समर्पित ऐ। मंत्री सतीश शर्मा होरें रेहबर-ए-खेल दे अध्यापकें दियें चिंताएं पर बी चर्चा कीती ते इस गल्लै दी तस्दीक कीती जे उन्दे मुद्दें गी केन्द्र सरकार तगर पुजाई दिता गया ऐ। उनें भरोसा दोआया जे लम्मे चिरे थमां चलदे आवा रदे सेवा सरबन्धी मामलें गी नबेड़ेया जा रदा ऐ ते इनें चिंताएं गी दूर करने लेई तौले गै लोड़चदी प्रक्रियाएं गी शुरु कीता जाग। इस मौके पर बोलदे होई उनें आखेया

<><><><><><>

PM-MKB

प्रधानमंत्री नरेन्द्र मोदी होर कल दिने 11 बजे अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे करडन। एह इस कार्यक्रम दी 126मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नी आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसी तुस रातीं 8 बजे इक बारी परतियै बी सुनी सकदे ओ। आकाशवाणी जम्मू दे प्रादेशिक समाचार एकांश आसेआ कल रातीं सांझे 10 बजे मन की बात पर इक बशेश परिचर्चा बी प्रसारत कीती जाहग जेहदे च सांझे परौहने होडन वरिष्ठ पत्रकार ते नामवर लखारी संत कुमार शर्मा ते उंदे कन्नै गल्लबात करडन सांझे न्यूज़ एन्कर जगमोहन शर्मा।



अज्ज मनाए जा रदे सैलसफा सरबन्धी कुल संसारी ध्याड़े दे मौके पर लैफ्टिनेंट गवर्नर मनोज सिन्हा होरें सब्भनें गी साददा दिता ऐ जे ओ भारत दे सिरै दा ताज खोआने आले जम्मू-कश्मीर दी यात्रा पर पक्क गै औन ते इत्थू दे कुदरती छलैपे सग्गो-सार, सांस्कृतिक विरासत ते बेजोड़ परौहनाचारी दा तर्जुबा हासल करन। सैलसफा सरबन्धी कुल संसारी ध्याड़े दे मौके पर अज्ज कटड़ा च श्री माता वैष्णो देवी जी दी यात्रा दे पारम्परिक मार्ग गी बढ़ावा देने दे मकसद कन्नै विरासती सैर आले इक कार्यक्रम दा आयोजन कीता गया। कटड़ा दे SDM पीयूष धोत्रा होरें इस विरासती सैर गी झंडी दस्सियै रवाना करोआया। इस मौके पर बोलदे होई उनें आखेया

सैलसफा सरबन्धी कुल संसारी ध्याड़े दे मौके पर अज्ज जम्मू खिते दे मानसर, पत्नीटाँप, बसोहली ते राजौरी इलाकें च बी कार्यक्रमें दा सरिस्ता कीता गया, जिस दौरान किछ्ती रैली, सांस्कृति प्रोग्राम, पर्यावरण दे अनुकूल सैर ते बक्ख-बक्ख मुकाबलें आले कार्यक्रम आकर्षण दा मुख् केन्द्र रेह। खरी मती गिनतरी च मुकामी लोकें ते सैलानियें इनें कार्यक्रमें च हिस्सा लैता।



India- Pak UNGA

भारत नै जंदे मई महीने पाकिस्तान कन्नै होए दे संघर्ष बारे तत्थें गी त्रोडी-मरोड़ियै पेश करने ते आतंकवाद दा महिमामंडन करने पर पाकिस्तान दी सख्त निंदेया कीती ऐ। संयुक्त राष्ट्र महासभा च पाकिस्तान दे प्रधानमंत्री शाहबाज शरीफ दे सम्बोधन दे मगरा एदे पर भारत दी

तरफा परता दिंदे होई भारत दे स्थाई मिशन च प्रथम सचिव पेटल गहलोत होरें आखेया जे भारत दी धरतें पर होए दे आतंकवादी हमलें लेई पाकिस्तान कसूरवार ऐ ते भारत गी पूरा अधिकार ऐ जे ओ आत्म-रक्षा लेई सख्त गेंई पुट्टै। भारत कन्नै रमानदारी दे शाहबाज शरीफ दे दावें पर प्रतिक्रिया दिंदे होई गहलोत होरें आखेया जे पाकिस्तान गी फौरी तौर पर अपनी धरतें पर चलै करदे सभ्भन आतंकवादी कैम्पें गी बंद करियै बड्डे ते बदनाम आतंकवादियें गी भारत दे हवाले करी देना चाहिदा। दुनिया गी गुमराह करने दे दोषी पाकिस्तान गी शैल फटकार लांदे होई उनें आखेया जे भारत परमाणु धमकी दे अगगै कदे बी नेंई झुकोग ते आतंकवाद ते इसी चलाने आलें गी दना बर्दाश्त नेंई करोग।

<><><><><><>

मुख्य भरै च मनाए जा रदे सेवा पर्व दे अंतर्गत अज्ज अस तुसेंगी दस्सगे कि किस चाली नरेन्द्र मोदी सरकार नै “एक भारत, श्रेष्ठ भारत” आली पैहल दे तैहत अनेकता च एकता दे भारत दे जजबें गी होर मजबूत बनाने दा कम्म कीता ऐ। प्रधानमंत्री नरेन्द्र मोदी हुंदे आसेया 2015 च रम्भी गेदी ए “एक भारत, श्रेष्ठ भारत” आली पैहलकदमी देशवासियें दा दिल बदांदी ऐ जे ओ इक दूए दे राज्यें दी संस्कृति, भाषा ते परम्पराएं बारे जानकार बनन ते उन्दे कन्नै जुड़न। बक्ख-बक्ख खितें च समुदायें गी आपूं-चे जोड़ियै इस कार्यक्रम नै भाईचारे ते इक-जुटता दियें तंदें गी हर मजबूत कीता ऐ ते भारत दी समृद्ध सांस्कृतिक विरासत दा जश्न बी मनाया ऐ। प्रधानमंत्री होर अकसर लोकें गी गुजारश करदे न जे ओ इक जुटता दी भावना गी होर मजबूत बनान

<><><><><><>

Sheetal World Champ

जम्मू-कश्मीर दे किश्तवाड़ दी 18एं बरे दी भारतीय पैरा तीरअंदाज शीतल देवी होरें अज्ज दक्खन कोरिया दे गवांगजू च पैरा विश्व तीर-अंदाजी चैम्पियनशिप च तुर्की दी दुनिया दी नम्बर इक खडारी ओज़नूर कयोर गिरदी गी 146-143 कन्नै हराइयै महिलायें दे कपाउंड व्यक्तिगत स्पर्धा च सुन्ने दा तगमा अपने नां करी लैता। टूर्नामैन्ट च इकलौती बगैर बांहे आली तीर-अंदाज शीतल नै अपने पैरें ते ठुडी कन्नै स्टीक निशाने लाए ते चैम्पियनशिप च अपना त्रिया तगमा हासल करी लैता। एहदे शा पैहले उनें कपाउंड स्पर्धा दे मुकाबले च तोमन कुमार कन्नै रलियै मिक्सड टीम दा कैह दा तगमा जितेया हा, उनें ब्रितानिया दी जोड़ी ग्रिनहैम ते नाथन मैकक्वीन गी 152-149 कन्नै हराया हा।